

Nous pouuons encore raconter parmy les merueilles que Dieu a operées en cette Eglise, ce qui s'est passé à l'égard d'une autre famille de cette nation. Vn ieune homme, dans le canot duquel i'estois embarqué, venant en ce païs; fut atteint du mal courant & contagieux, sur la fin de l'hyuer; ie tafchay de luy rendre autant de charité qu'il m'auoit fait de mal en chemin. Comme il estoit assez considerable, on n'espargna aucune sorte de iongleries pour le guerir, & l'on en fit tant, qu'enfin on me vint dire qu'on luy [97] auoit tiré du corps deux dents de Chien; ce n'est pas cela, leur dis-je, qui cause son mal, mais bien le fang pourri qu'il a dans le corps; car ie iugeois qu'il auoit la pleuresie: cependant ie me mis à l'instruire tout de bon, & le lendemain, l'ayant trouué bien disposé, ie luy donnay le saint Baptesme avec le nom d'Ignace, esperant que ce grand Saint confondroit le malin esprit, & les Iongleurs. De fait, ie le fis feigner, & montrant le fang au Iongleur qui estoit là present: voila luy dis-je, ce qui tue ce malade, tu deuois luy auoir tiré tout ce fang corrompu par toutes les simagrées, & non pas des dents de chien supposées: Mais luy s'estant apperceu du soulagement que cette feignée auoit causé au malade, voulut auoir la gloire de sa guerison; & pour cela luy fit [98] prendre une espece de Medecine, qui eut vn si malheureux effet, que le Patient demeura trois heures durant comme mort. On en fait le cry public par tout le Bourg, & le Iongleur bien surpris de cet accident, confesse qu'il a tué ce pauvre homme, & me prie de ne le pas abandonner. Il ne fut pas de fait delaisié de son Patron saint Ignace, qui luy rendit la vie, pour confondre les superstitions de ces Infidelles.